

12 Chwefror 2014

Teitl y Papur	Strategaeth Reoli Gwybodaeth Cyfoeth Naturiol Cymru
Cyfeirnod y Papur:	NRW B O 11.14
Noddwyd y Papur gan: Awdur y Papur yw:	Ceri Davies Helen Wilkinson

Pwrpas y Papur:	Cyflwyno Strategaeth ddrafft Rheoli Gwybodaeth Cyfoeth Naturiol Cymru
Argymhelliad:	Cymeradwyo'r strategaeth
Angen Penderfyniad:	

<p>Effaith: Dylid nodi – mae'n bosib nad yw pob pennawd yn berthnasol i'r pwnc</p>	<p>Effaith ar yr Amgylchedd: Bydd rheoli a rhannu ein gwybodaeth yn ein helpu ni ac eraill yng Nghymru, y Deyrnas Unedig ac Ewrop i wneud penderfyniadau gwybodus ar gamau gweithredu a pholisïau sy'n effeithio ar yr amgylchedd.</p> <p>Effaith ar yr Economi: Bydd rhannu ein gwybodaeth a'n data ag eraill a sicrhau eu bod ar gael i'w hailddefnyddio yn cyfrannu at yr economi gwybodaeth yng Nghymru a thu hwnt.</p> <p>Effaith ar Gymunedau: Bydd gwella'r modd y rhannwn ein gwybodaeth ar lefel leol a chyfnewid gwybodaeth â chymunedau lleol yn gymorth inni wella ein dealltwriaeth o faterion lleol ac yn ein helpu i gynnwys cymunedau a rhoi grym iddynt mewn penderfyniadau a chmau gweithredu perthnasol i'w hamgylchedd lleol.</p> <p>Effaith ar Wybodaeth: Wrth reoli a rhannu ein gwybodaeth yn effeithiol ar draws Cymru, y Deyrnas Unedig a thu hwnt, byddwn yn chwarae ein rhan mewn rhwydweithiau cyfnewid gwybodaeth</p>
---	--

Pwnc

1. Mae gwybodaeth yn sail i gyflawniad llwyddiannus pob un o'n hamcanion strategol.
2. Mae gwella'r ffyrdd y rheolwn ac y rhannwn ein gwybodaeth yn hanfodol i wella'n canlyniadau a chyflwyniad ein gwasanaeth, yn help i sicrhau effeithlonrwydd yn ein sefydliad ac yn help i gynnal hygyrddedd ac atebolrwydd ein penderfyniadau a'n gweithredoedd.

Crynodeb

3. Mae'r papur hwn yn cyflwyno ein strategaeth ddrafft ar gyfer rheoli gwybodaeth ar gyfer 2014-2016.

Y cefndir

4. Gan gydnabod mor bwysig yw rheoli gwybodaeth yn effeithiol i gyflawni ein hamcan, yn ein Cynllun Busnes ar gyfer 2013/14 cynhwyswyd targed penodol i gyflwyno Strategaeth Wybodaeth.
5. Mae cytuno ar strategaeth wybodaeth newydd yn ein blwyddyn gyntaf yn arbennig o bwysig gan fod angen inni reoli trosglwyddiad asedau gwybodaeth a gwasanaethau gwybodaeth o'n cyrff gwreiddiol i'n sefydliad newydd.
6. Wedi'r trosglwyddiad, byddwn yn gyfrifol am symiau newydd, helaethach o ddata a gwybodaeth y bydd angen eu rheoli mewn ffyrdd newydd a chyson. O'u rheoli'n briodol, bydd ein casgliad gwybodaeth newydd yn gymorth i greu diwylliant unedig drwy rannu un sylfaen wybodaeth ac arfau rhannu gwybodaeth.
7. Datblygwyd y strategaeth ddrafft a gyflwynir yma gan ddefnyddio:
 - Arweiniad ac ymgynghoriad gan ein Bwrdd Pontio Rheolaeth Gwybodaeth a Hysbysrwydd a Grŵp Gwybodaeth y Bwrdd
 - Cysylltu ac ymgynghori mewnol â staff ar draws ein holl swyddogaethau trwy ddau weithdy (70 o staff), negeseuon ebost i ddilyn, a grŵp cyfryngau cymdeithasol mewnol (140 o aelodau)
 - Ymgynghori â'r tîm Pontio TGCh i sicrhau y cefnogir yr amcanion gan y strategaeth TGCh a'u bod yn cyd-fynd â'r map ar gyfer TGCh
 - Ymgysylltu'n gynnar â Llywodraeth Cymru ynglŷn â'i Strategaeth Gwybodaeth a Hysbysrwydd bresennol a gyda golwg ar y Strategaeth Wybodaeth sy'n cael ei datblygu gan Defra
8. Cafodd yr egwyddorion, yr amcanion strategol a'r anghenion allweddol a amlinellir yn y strategaeth eu datblygu trwy gyfuno canlyniadau'r gweithdai ag arweiniad gan ein bwrdd rhaglen fewnol a Grŵp Gwybodaeth ein Bwrdd, gan fynd ati i ddatblygu'r strategaeth o'r brig i lawr ac o'r gwaelod i fyny. Datblygwyd y cerrig milltir trwy ymgynghori'n benodol â chynrychiolwyr allweddol.
9. Mae'r strategaeth yn disgrifio ein bwriad strategol; mae rhai gofynion yn uchelgeisiol a gallent gymryd mwy o amser i'w cyflawni na chyfnod y strategaeth. Blaenoriaeth y cerrig milltir cynnar yw creu sylfaen dda ar gyfer rheoli gwybodaeth.

Y Camau Nesaf

10. Hyrwyddo'r strategaeth yn fewnol a rhoi'r cynllun lefel uchel ar waith.

11. Mae'r strategaeth wedi'i drafftio ochr yn ochr â'r Cynllun Corfforaethol a Chynllun Busnes 14/15. Unwaith y byddwn wedi cytuno ar y Cynllun Corfforaethol a'r Cynllun Busnes, caiff y strategaeth ei hadolygu er cysondeb a chaiff adrannau perthnasol eu diweddarau.
12. Byddwn yn adolygu ein blaenoriaethau bob chwe mis yn ystod oes y strategaeth hon gan ymateb i unrhyw heriau sy'n ymddangos ac unrhyw gamau i wneud y broses yn fwy effeithlon.

Peryglon

13. Dibyniaeth ar TGCh i gyflenwi set o systemau ac arfau i gynnal gweithgareddau rheoli gwybodaeth, tra byddwn yn ymdrin â'r blaenoriaethau cyntaf ar gyfer systemau gweithredol eraill, yn sgîl ein symudiad i ffwrdd oddi wrth ein hen systemau.
14. Bylchau o ran capasiti a medr a fydd yn effeithio ar ein gallu i ymdopi â'r cynnydd ym maint a chymhlethdod gweithgareddau rheoli gwybodaeth yn sgîl trosglwyddo gwasanaethau o'r cyrff blaenorol.
15. Y potensial ar gyfer methu cydymffurfio, neu oedi, oherwydd diffygion capasiti, pontio a TGCh.

Goblygiadau Ariannol

16. Nid yw'r strategaeth wedi'i chostio'n llawn, ond mae sawl cam gweithredu'n rhan o'n trefniadau ar gyfer y rhaglen bontio, a fydd yn rhyddhau adnoddau neu'n digwydd drwy newid blaenoriaethau gweithgareddau ac adnoddau a ffyrdd newydd o weithio o fewn yr adnoddau sy'n bodoli.
17. Mae'r ddogfen hon yn amlinellu ein bwriad a'n dyheadau strategol, a byddwn yn ei hadolygu'n gyson i sicrhau ei bod yn uchelgeisiol ac yn ymarferol.
18. Gall rhai camau gymryd mwy o amser i'w cyflawni ac fe roddwn wybod am hyn wrth inni gyflawni'r camau, gan adolygu ein gwaith ar sail ein profiad.
19. Bydd y camau gweithredu isod yn gymorth inni yn ein gwaith parhaus o asesu fforddiadwyedd a blaenoriaethau ar gyfer y cyfnod gweithredu nesaf:
 - cam 3.1: cynllun datblygu ein pobl ar gyfer rheoli gwybodaeth
 - cam 9.4: adolygiad o broses rheoli gwybodaeth
 - y potensial i ailfuddsoddi adnoddau sydd wedi'u dyrannu ar hyn o bryd i Asiantaeth yr Amgylchedd a'r Comisiwn Coedwigaeth trwy gytundebau lefel gwasanaeth
 - mwy o gydweithio ym maes caffael gyda Llywodraeth Cymru, Defra a phartneriaid perthnasol eraill
 - Caiff y cynllun gweithredu ei adolygu a'i ailflaenoriaethu unwaith y bydd y wybodaeth hon gennym.

Cyfathrebu

20. Bydd yr egwyddorion a'r amcanion strategol ar gael i'w cyhoeddi ar ein gwefan
21. Caiff y strategaeth a'r cynllun gweithredu eu cyhoeddi a'u hyrwyddo'n fewnol ar ein mewnwyd a chyfryngau cymdeithasol mewnol
22. Hyrwyddo'r strategaeth gydag Adrannau a mwy o ymgysylltu ynghylch y cynllun gweithredu

Asesiad o'r effaith ar gydraddoldeb

23. Does ar y strategaeth ddim angen asesiad o'r effaith ar gydraddoldeb ond gall fod angen asesiad o'r fath ar gyfer unrhyw bolisi ategol newydd neu ddiwygiedig a ddatblygir wrth gyflawni'r strategaeth.

Mynegai Atodiadau

1. Strategaeth Reoli Gwybodaeth 2014-2016